

Til Austrheim kommune

post@austrheim.kommune.no

Frå Asbjørn Brandtun

Planstrategi for Austrheim kommune 2020-2024-høyring.

Dette er innspel/framlegg til prioritering av 2 planoppgåver.

Framlegg:

Næringsplan

I høyringsutkastet står det under verdier, mål og prinsipp(sitat):

«Me skal leggja stor vekt på næringsutvikling og bærekraftige arbeidsplasser»

Det ligg føre tre næringsplaner:

- Felles næringsplan for tidligare Lindås kommune og Austrheim kommune, vedteke i 2011.
- Næringsplan med fokus på reiseliv og havsport, vedteke i 2014.
- Landbruksplan, vedteke i 2009.

I tillegg jobbar Equinor m.fl. med store planer for vidare utvikling på Mongstad, mellom anna prosjektet Green Spot Mongstad.

Kommunen jobbar med reguleringsplan for det store kommunale næringsområdet på Kaland.

Austrheim har behov for eit mangfald av arbeidsplassar, som tilbod til ulike grupper i lokalsamfunnet.

Austrheim har difor eit stort behov for å jobba meir systematisk med ein samla plan for næringsutvikling. Dette må organiserast i eit praktisk prosjektsamarbeid med næringslivet og engasjerte personar.

Austrheim vidaregåande skule(AVS)

I høyringsutkastet er det teke med arbeid med reguleringsplan for skuleområdet ved AVS.

Skulen er svært viktig for Austrheim og dei mindre kommunane i området.

Skulen har over mange år hatt ei negativ utvikling, med nedlegging av fagtilbod og nedgang i elevtal frå knapt 400 elevar rundt 1996/97 til ca. 200 elevar i 2020.

Fylkesrådmannen foreslo i 2016 nedlegging av skulen, men fylkestinget vedtok samrøystes at skulen skal oppretthaldast og utviklast. Likevel har den negative utviklinga halde fram.

Det må snarast jobbast med ein aksjonsplan på kort sikt og utarbeiding av ein utviklingsplan fram mot skulen sitt 50-års jubileum i 2027. Næringslivet, regionrådet og kommunane i regionen må ha ein sentral rolle i dette arbeidet.

Bakgrunn

Planer er viktige reidskaper i arbeidet med utvikling av lokalsamfunnet.

Kommunen har over tid vedteke mange planer- kommuneplan, kommunedelplaner, sektor- og temaplaner og verksemdplaner- i alt fleire titals planer. I tillegg kjem mange reguleringsplaner.

I alle desse planane er det lista opp ei mengde med prosjekter/tiltak.

Likevel har Austrheim på fleire måtar hatt ei negativ utvikling dei seinare åra:

- Veksten i folketallet har stagnert og det er færre unge og fleire eldre.
- Austrheim har mange sysselsette i oljesektoren, ein næring under omstilling.

- Kommuneøkonomien har gått med underskot, og kommunen har høg lånegjeld og små fondsreserver.
- I skulen er det relativt mange elevar med behov for spesialundervisning
- Utgifter til barnevern er høge.
- Austrheim har mista viktige funksjonar:
 - Sparebankfilialen
 - Offentleg tannlege
 - Lensmannskontoret
 - NAV-kontoret
 - Næringsshagen for Nordhordaland
- Austrheim vidaregåande skule har hatt ei negativ utvikling over mange år med bortfall av fagtilbod og nedgang i elevtalet. Dersom ein ikkje greier å snu denne utviklinga, vil skulen kunne verta lagd ned.

Oppfølging

Rammene for dette arbeidet er nasjonal politikk, økonomisk utvikling og utfordringar og ressursar i vårt område.

Å arbeida med planer er tid- og resurskrevande. Det er viktig å konkretisera formål, nytteeffekt og konsekvensar. Like viktig som arbeid med å utarbeida planer er oppfølging og gjennomføring av tiltaka i planer.

Austrheim er ein liten og oversiktlig kommune. Planer må vere så enkle og konkrete som mogleg. Kommunen bør vurderer om tverrsektor- og tverrfaglege planer kan slåast saman. Det same gjeld avdelingar sine verksamdplaner. Dette vil kunne gjera det lettare å sjå samanhengar, konsekvensar, resultat og samstundes spara tid og ressursar.

Kommunereformen er ikkje avslutta. Regjering og Storting vil jobba vidare med større og færre kommunar. Dette vil påverka kommunal økonomi og planlegging.

Mongstad med mange bedrifter og arbeidsplassar og nærleik til nest største byregion, gjer at Austrheim ikkje er ein utkantkommune som mange andre kommunar langs kysten. Personar kan difor bu i Austrheim og pendla til arbeid med akseptabel reisetid. Interkommunalt samarbeid vil vera ein viktig del av planarbeidet. Samstundes er det stor konkurranse mellom kommunar og regionar om arbeidsplassar og folk. Sentralisering er og vil vera ei sterk kraft. Å skape attraktive bu og oppvekstvilkår for unge og unge vaksne må difor vere ein viktig og prioritert oppgåve.

Austrheim må verta flinkare til å utnytta dei naturgjevne, økonomiske og kunnskapsressursane som fins i lokalsamfunnet. Bedrifter, lag/organisasjonar og innbyggjarane representerer eit mangfald av kunnskap/kompetanse. Dette er ressursar som kommunen kan utnytte mykje betre i kommunal planlegging og utbygging. Å få til dette krev ein aktiv innsats. I dette arbeidet er det også spørsmål om å tenkja nytt. Å tenkja «utanfor boksen» og verta betre i å arbeida på tvers fagleg og geografisk. Tidsbruk og haldningar er viktige faktorar i dette.

Kommunen, politisk og administrativt, har som myndigheit, produsent av velferdstenester og som største arbeidsplass, ein avgjerande rolle i dette arbeidet.